

石

匱

書

石匱書卷第一

明 蜀人張岱著

高帝本紀

高皇帝沛人也。熙祖徙句容。又徙泗上。仁祖徙鍾離之太平鄉。周世宗巡幸淮南。見荆塗二山。謂侍臣曰。濠州朝岡有王氣。終當大業。後三百七十年而高帝生。之夕。火光燭天三日。仁祖出河上。汲水洗兒。有紅羅浮至。遂取衣之。故所居名紅羅障。年十七。

泗州大疫父母相繼死長兄及季又死貧不能殮藁
葬之仲與高帝昇至山麓綆絕仲近取綆留高
帝守視忽雷雨大作高帝趨避村寺中比曉往視
土墳起成高龐走告地主劉繼祖大駭異遂以地歸
朱氏而棄其責無幾仲又死高帝孤才無依乃託
身皇覺寺為寺僧養鵝溺園之他所游戲鵝終日
不敢出園別鵝色為隊鵝皆分隊立居兩月歲荒寺
又乏食僧四散高帝至合肥厯汝潁三年復歸寺

寺廢久 高帝棲於伽藍惟舉義吉遂走江淮道病
有二紫衣人同寢處愈失所在又常夜行陷麻湖中
有羣小兒謠迎聖駕叱之不見 高帝心異之聞郭
子興據濠乃叩濠求入門者欲兵之子興免焉台與
語大悅收為親兵妻以所育馬氏女是為高皇后郭
氏軍中呼 高帝曰朱公子至正十三年子興屯兵
定遠委公子南收兵得七百人自將之再破張家堡
又得壯士三千人遂以三千人襲元張知院於橫澗

寨走之收其兵二萬而乘勝攻下和州公子入城撫
民凡軍中所掠婦女悉還之和民大悅十四年郭子
興死十五年六月議渡江俞通濟廖永安等以舟師
來附公子大喜遂率諸將乘舟渡江常遇春奪采石
磯先登取太平路豫書禁約入城張其禁者儒李習
陶安率父老迎改路曰府置太平興國翼元帥府諸
將奉公子為大元帥李善長為帥府都事以李習知
太平府事陶安叅幕旗志及將士戰衣皆上赤八月

元將陳瑊先與蠻子海牙夾攻徐達鄧愈等出姑熟
逆戰湯和繞其後轉戰至城北雙龍見障端元人愕
卻視達等急擊之大敗擒瑊先大元帥解其縛命統
其軍以攻臺城瑊先復叛使溧陽民兵百戶盧德茂
佯降授計以殺瑊先遂大破蠻子海牙舟師十六年
三月克金陵元御史大夫福壽死之大元帥嘉其忠
以禮葬焉召官屬父老諭曰元失其政兵戈紛擾生
民塗炭吾所以至此者除亂耳爾等各安職業毋懷

疑懼有賢人君子能相逆者吾將禮用之其舊政不
便者竭除之改集慶路為應天府七月諸將士乃奉
大元帥為吳國公十七年拔婺州改為寧越府十九
年方谷珍以溫台慶元三郡來獻二十年偽漢寇太
平花雲死之犯龍江公授康茂才等方略漢兵潰去
尋取信州遣使徵宋濂劉基章溢葉琛至金陵八月
公駕樓船率師伐漢立吊民伐罪納順招降之幟有
鳥數萬翼檣以飛蛇幡於舵次日龜來牛渚與蛇會

常遇春擊退漢兵於湖口追至江州陳友諒遁武昌
改龍興路為洪都府二十一年江以西具平二月苗
軍叛殺胡大海王愷死之七月公閱兵三山即崇興
叅政趙繼祖謀叛有疾風吹旂觸公衣公易服從間
返事覺伏誅二十二年募水師二十萬征漢有大魚
二夾公舟自新河口過小孤山丙戌友諒東出鄱陽
湖迎戰丁亥遇於康郎山大戰五晝夜公益乘戰船
橫亘二十餘里盡載火鎗火箭大小將軍等砲敵船

當之立糜友諒船大不能旋轉而我軍以輕舟衝突
來往如飛炮火連天湖水為赤是日友諒弟偽五王
溺死退保鞋山公集諸將曰我提兵百萬千里遠來
剪除暴虐天以此賊付吾掌中此機不可失遂拔劍
誓曰交鋒有不用命者斬遂令釘水門平碁撒上下
木梯拽搖四廂懸鈴兵皆倒身搖櫓船下如箭與敵
船距二百武器銃亂發如雨敵船以板牌遮掩匿不
敢出公令康鐸等率壯士以大綽挽船逆上十五里

順水再下敵船望之如排山倒海交諒度不能支開
箭窻覓小船走而流矢中其腦貫睛死報至公急傳
令曰交諒死將士敢擅殺一人者斬敵軍全船來歸
啣首尾不絕公大悅曰今日之功勝赤壁走曹瞞遠
矣大饗士卒偽平章陳崇擁交諒子理奔武昌命常
遇春追至武昌圍之二十三年公晉吳王以武昌久
不下親往視師命急擊之理啣壁出降荆湘悉附追
封花榮為東丘侯三月吳王至建康置起居注給事

中悉罷諸翼統軍元帥府置十七衛親軍指揮使江
西行省進陳友諒所造金錢象牙床王曰此何異孟
昶七寶溺器其亟毀之四月廟祀鄱陽死事之臣三
十六人於康郎山五月置翰林院以陶安為學士召
諸儒集闕下議禮制王問宋濂孔克仁曰漢治何不
三代也克仁對曰王霸之道雜王曰咎將誰始對曰
在高祖王曰然高祖創業未遑禮樂孝文時常制作
復三代之舊乃逡巡未遑使漢家終於如是三代有

其時而能為之漢文有其時而不為耳周世宗則無
其時而為之者也九月塑功臣像於卞臺廟改長安
州曰長興州二十四年正月常遇春克漢故將熊天
瑞於贛州賜書獎其不殺遇春進師南安招諭嶺南
諸郡南韶皆降五月命訪古今書籍藏之秘府十一
月命徐達等討張士誠十二月立社稷宗廟建宮室
營繕進圖王去其奇麗者曰茅茨而聖彫峻而止吾
節儉是師民力其弗殫乎命博士熊鼎編古人事可

鑒戒者書殿壁命正樂律萬舞之制詔以明年為吳
元年元年正月定文武科取士法有一老人告省局
匠曰吳王即位三年當平一天下匠驚問之曰我太
白神也去不見六月諭憲臣曰任官不當則庶事不
理用刑不當則無辜受害故刑不可不慎也夫置人
於孫楚之下何求不得古人用刑本求生人非求殺
人故欽恤為用刑之本九月偽吳平封李善長宣國
公徐達信國公常遇春鄂國公諸將賞賚有差明日

入謝王曰公嘗還家置酒為樂否對曰荷上恩有之
王曰吾亦欲置酒一歡中原未平尚非其時張氏君
臣飲食宴樂今竟亡公等所知也諸臣頓首謝十月
遣常遇春率甲士二十五萬繇淮河入以取中原馳
檄齊晉河洛燕秦多奉圖籍來降命胡廷瑞等取福
建楊璟等取廣西十一月頒戊申曆王自壬辰舉義
旅至是十有七年百官父老累表勸進乃以明年戊
申正月祭告天地即皇帝位於應天府建元洪武定

有天下之號曰大明

洪武元年正月追尊四代考妣為皇帝皇后立妃馬氏為皇后世子標為皇太子命議郊廟及百神祀典立大社大稷自舊內遷於新宮是月天下官來朝陞辭上曰初飛之鳥不可拔其羽新植之本不可搖其根天下始定才力俱困夫惟廉者能約己而利人二月以太牢祀孔子定宗廟時享禮四並歲除凡五禁胡服胡語胡姓定賦役法四月改太史院為司天

監徵天下賢才為守令七月上手繪征進陣圖授
徐達取元都諭曰元君不德民復何辜諸將克城之
日毋擄掠毋焚蕩毋妄殺人凡元宗戚皆善待之達
會兵臨清進克通州元主走上都八月達入燕元亡
始設六部官分理庶務以膝股楊士義錢用士陳寬
周禎單安仁為尚書大赦天下詔曰元政隳夷朕以
布衣起戎伍憤生民塗炭與豪傑共靖之賴天之靈
因民之欲黃旗所指強殞弱服大河以北暨于南海

罔不來臣顧念推戴而來軍士勞苦農民罷敝者未
安刑亂未平供億未舒賢人君子逃匿巖穴者未來
朕甚愿爲爰布溥恩與民更始可大赉天下於戲爾
民之蕩析離居者十有七年光嶽之氣於今始復其
各厚爾生保爾家共享太平之福不其麻與 上幸
北平放元宮人復命學士詹同等分行十道訪遺逸
十月 上還金陵建大本堂選儒臣教授太子諸王
復朔方蠲是年田租詔報四夷君長告即位毀元王

所製水晶宮漏十一月孔希學襲封衍聖公

二年正月免畿輔北平河南東西田祖詔曰頃命將
北征齊魯之民壹簞餽餉不辭千里其何忍復勞爾
下晉冀平幽燕困憊尤甚可二稅並蠲有司更加存
恤以副朕懷立功臣廟於雞籠山勅中書省曰朕起
臨濠渡大江以除禍亂每念諸將相逆戮力有捐軀
建功未食其報者朕甚痛之人誰無死若諸將軍生
著忠勇死而廟食亦可謂不朽矣其序封爵肖像祠

春秋勿絕并令祀元右丞余闕總管李黼以厲風教
定太歲風雲雷雨嶽瀆山川城隍諸神名號祭禮遣
官祀孔子於闕里更定太廟時饗禮命築壇後湖祀
馬祖諸神二月耕藉田 皇后率內外命婦饗於北
郊修元史賜璽書諭占城爪哇日本等國詔立皇陵
碑上仁祖陵曰英陵旋更為皇陵立護衛築禁垣有
司奏民間墳墓在傍當外徙 上曰此皆吾家舊隣
里不必外徙凡在垣內者春秋祭掃聽民出入其弗

禁三月改奉元路為西安府命博士孔克仁等授諸
王子經功臣子弟亦令入學詔編祖訓錄定封建諸
王國邑及東宮官屬制遣使以登極改元諭吐蕃四
月淮安等府各獻瑞麥羣臣稱賀上曰朕為生民主
惟思脩德致和三光平寒暑時為國家之瑞不以小
物為瑞也漢武帝獲一角獸產九莖芝好功生事卒
使海內空虛其後神爵甘露之後至山崩地震而漢
德於是乎衰由此觀之嘉祥無徵而災異有驗可不

戒哉禮部議國家祥瑞按唐六典四瑞有大瑞中瑞下瑞之類令所司表奏上曰卿等所議但及祥瑞而不及災異不知災異乃上天示戒所繫尤重今後四方或有災異無論大小皆令所司即時飛奏五月上幸鍾山歸縣獨岡步至淳化門始騎而入謂侍臣曰朕久不歷農畝適見田者冒暑而耘心甚憇之不覺徒步至此一日退朝太子諸王侍指宮中隙地曰此非不可構臺榭為游觀地顧吾念之漢文帝欲作

露臺計其費曰百金文帝曰百金中人十家之產也
竟已之故吾令閹人種蔬誠不忍傷民力耳爾等誌
之六月功臣廟成論次諸臣功造太廟祭器成八月
元史成禮官議建行殿於二丘壇南社稷壇北以脩
風雨望祭從之九月以臨濠為中都制鐵券十月詔
天下府州縣立學宮遣元主書先是元主北適元臣
李思齊張良臣以次降而良臣復叛徐達擊斬之獨
擴廓桀逆為西北患尚藉元主聲息迺致書曰朕本

布衣同海內鼎沸不能自寧君又失於控御致諸將
名為元臣往々內懷不軌擴廓李思齊張思道三人
也分據秦晉互相讐殺荼毒生靈是孰可忍其羣雄
割據朕已勘定之將以觀君自為計大將軍蹂躪秦晉
出河洛次秦隴指燕趙而君棄宗社去矣朕多君智
謂君自揣無百年之運順天之道我歸故物得上策
為已聞君率殘胡留連塞上欲以何為今思齊束手
思道就戮擴廓一已崩竄矣以君昔之富強尚不可

以逞今遠寄沙漠政如孽雁聞弦而隕欲效漢之
匈奴之突厥出沒無常以為邊患不已難乎方今中
國封疆盡為我有華夏已平外夷咸附若命將出師
直抵陰山之北君雖有百萬之衆亦不過死灰餘燼
涸轍腐鱗耳君即遁逃亦將無所往矣朕以誠心待
人明示機策惟君寔圖之元主徙和林十二月御奉
天殿大賞定中原征南將士有差封陳日煚為安南
國王王顓為高麗國王

三年正月大將軍徐達率李文忠等北征禮部奏定
朝日夕月禮遣使往安南高麗占城祀其國山川仍
摹錄碑碣圖籍以歸二月御東閣學士宋濂侍制王
禕進講大學平天下傳上曰固也人者國之本德
者人之本德不足以懷衆雖有財安所用之上行
後苑有鵲巢乳雛嘆曰禽鳥尚爾況人乎令羣臣親
老者許黽養名諸郡富民入見諭以孝敬和睦循分
守法賜酒食而遣之三月免南畿河南山東北平田

祖四月以封建諸王告太廟置長史以下官屬元君
安懼睦爾祖於應昌其子愛猷識理達臘嗣立五月
遣使訪歷代帝王陵寢令行省臣廟祀具圖以聞命
天下守令舉學識篤行之士禮送京師左副將軍李
文忠等克應昌獲元主孫及后妃冊寶重器復詔天
下曰庚申君荒淫昏弱以亂區寓羣雄竊起毒擾生
靈此天有意以啓朕躬朕驅除暴蠹開闢介冑混一
天下十有九年於茲庚申君病弱其孫枝眷屬

在俘虜禮宜獻廟朕深不忍也是與他僭竊者不同
其封買的里八剌為崇義侯后妃等官給服食以示
懷柔倘愛猷識理達臘來歸當令作賓於朝以存元
祀曩元起沙漠猶能令胡越一家豈以堂堂天朝包
荒有外爾元臣庶有審識天命傾心南嚮者吾將擢
用之於戲君舟臣水覆載不常可不畏哉時大旱
上禱於壇席藁暴露令后妃執爨為昔日農家之食
太子捧楹稌麻麦穀粟以進凡三日始還天廼雨行

大射禮詔國學郎是諸生習射戊申夏至祭地於方
丘詔考歷代服色所尚禮官奏以為宜尚赤從之八
月募民輸粟中鹽禮官言天子食日以樂上曰古
帝王德隆化洽日一舉非過也今人民新罹鋒鏑瘡
痍未起北征將士尚在暴露朕何以軒縣為哉其寢
勿舉九月改司天監為欽天監十月致書元嗣子謚
故元主為順帝十一月大封功臣宴畢謂曰天下大
業以艱難得之必當以艱難守之人情常謹於憂患

而忽於宴安不知憂患之來常始於宴安也今日與
卿等宴飲極歡恐久而忘其艱難故相誠勉耳明日
諸將詣闕謝命賜坐泛容語之曰曩與卿等初起圖
自全非有意天下也渡江以來眎羣臣無遠志而陳
張二寇尤驚甚朕無恃所恃者卿等一心耳初與二
寇角人以士誠近在肘腋先事撲滅是亦一計不知
陳剽而躁其志驕張狡而懦其器小志驕則奸生事
器小則無遠圖故鄱陽之役與戰宜邀吾固知士誠

必不能越姑蘓一步以爲之援也向令先攻士誠則
友諒空國而來何以應之姑蘓又猝不可拔大事去
矣朕何知：先後着耳二寇除人又計且盜群誰乃
取元都卿等欲直走元都兼舉隴蜀皆未合朕意朕
命卿等先取山東次河洛者以先聲既震燕薊自靡
耳且朕親駐大梁止潼關之兵知擴廓張瑄皆百戰
之餘未肯遽降急之非北走元都則西奔隴蜀并力
一隅未易定也故出其不意反旆而北元衆胆落不

戰自奔然後西征張李勢屈乃降惟擴廓力戰以拒
朕師向使未平元都先與之前彼人望未絕困獸猶
關勝負未可知也事勢與張陳正相反至於閩廣傳
檄而定區：巴蜀恃其險遠此特餘事耳卿等可以
少解甲冑之勞矣達等皆頓首稱萬歲詔設壇祭功
臣已歿者贈賞有差且祿其子孫并祭戰歿軍士卹
其父母妻子十二月大明志成建奉先殿於乾清宮
左自大祭饗外每生辰節序用常饗行家人禮中都

營建落成

四年正月諭中書省曰今日寒迺甚於冬況荒漠積雪吾守邊將士良苦其給諸鎮布帛綿纈較歲常有加二月命湯和傅友德等分道伐蜀三月幸中都尋還京令各省取士連試三年自後三年一舉著為例改築園立方澤命吏部議內官品秩因諭侍臣曰古宦豎不過司晨昏供掃除而已自漢鄧太后稱制乃以閹人為常侍為患便如城狐社鼠吾所以防之歟

嚴補祀法必斥去履霜戒堅冰也迺命鑄一鉄榜勒
內臣不得干預政事預者斬挂午門四月徵山林隱
逸之士五月免江浙田租詔勸興禮俗六月蜀平太
廟九奏樂章成命協律者歌之上曰古樂之廢久
矣而勝國充靡淫詞豔曲襍以胡音甚或飾為隊舞
諧戲殿廷非所以宣太和崇治體也今所製頗有和
平廣大之意其喧譟鄙褻者悉除之十二月開茶市
賞平蜀將士有差封陳理為歸德侯明昇為歸義侯

徙高麗 上觀浚河三山門見夫卒裸行水中命罷
役曰今日重裘猶寒卒苦乃爾遂併遣工匠之營中
都者

五年正月詔犯罪當戍兩廣者俱徙臨濠屯田廣西
洞蠻叛鄧愈等擊定之二月開文華殿選茂才異等
命翰林諸臣分教之三月詔天下行鄉飲酒禮六月
賑山東民飢免畿輔田租旬容民獻同蒂嘉瓜抑不
受曰草木之祥產其地其地之人應之朕何與焉若

天下時和年豐則王者之瑞也賜千錢而遣之十月
詔諭省臣曰求治譬之馭馬急銜勒厲鞭策馳騁不
已鮮不顛蹶馬之蹶矣人獨能無傷乎元季郵政盡
百姓力大類此朕甚痛之其自今軍國重使勿給傳
有司其移存恤稱朕意內使奏增飼虎肉 上曰牛
代耕馬代步虎何為者而飼之命付大庖他禽獸悉
縱遣之命省府置銅櫃簿錄時政倣列國史遣使與
元幼主書曰朕觀前代獲止國子孫必獻俘廟社以

明得志其陽示優待者不旋踵予鴆矣即寔家於宋
幼主難髮為僧終亦不免朕良痛悼今君之子至京
已三年優禮有加君宜以時遣使取歸朕生長君朝
豈有志今日自四海土崩民罹荼毒朕始興師救民
驅除僭竊君家父子亦不守宗社北適沙漠此天運
非人力也故特致書諭朕意為君亦察之母為寇災
矣又與元臣劉仲德朱彥德曰至正之君殂於北荒
幼主孱弱諸臣無不掉臂去者獨二生竭力守護朕

甚嘉之今特遣使諭爾君令取其子二生宜教人全
父子之倫勿為邊患爾君之宗祀不絕二生之家族
亦可長保不然者大軍出討旌旂綿亘於陰山二生
能身膏草野名垂竹帛無奇男子事也或不能徇國
名為俘虜將何面目見朕乎爾其熟圖之

六年正月諸守令來朝命列上郡國山川險易圖二
月罷科舉：賢良三月分遣諸將脩倭虜昭鑒錄成
頒賜諸王四月贈謚開國功臣詔求賢才五月祖訓錄

成分賜太子諸王六月免河北旱蝗田租七月辦姦
錄成頒賜廷臣八月定釋奠先師孔子樂章修大明
日曆始祀三皇建歷代帝王廟遣使諭大將軍達曰
卿等與朕定天下勲業已成而殞：殘胡尚久暴師
此誰任其咎哉昔田單攻狄不下魯仲連曰將軍在
即墨與士卒同甘苦所以致勝今將軍東有夏邑之
奉西有淄上之娛黃金橫帶馳騁乎其間有生之樂
無危之心所以不勝也卿等今日大類此幸毋徒壘

於梧立為仲連所詣達以分兵擒討以是冬破虜於
大同九月賜臨濠造作軍士衣糧詔禁四六文辭論
詞臣曰詔詰以漢為式表箋以柳宗元代公綽謝表
及韓愈賀雨表為式頒於天下十一月潞州貢人參
太原進葡萄酒皆却之閏十一月定糾內官法十二
月浚開封漕河

七年正月命都督王簡等往彰德濟寧諸處屯田訓
練軍士二月親祀先師命修治關里廟廡祭器法服

仍設孔顏孟三氏子孫教授免平陽太原等郡田租
四月置鑄冶十三所五月大寧輯皇明寶訓成六月
立皇陵祠祭署以濠里人汪文劉英為令丞世其官
七月議增園丘方丘從祀八月躬祀歷代帝王於漢
高帝前加獻三爵謂從祀諸臣曰漢高帝不階尺土
手提三尺以致大位其艱難與朕正等可多飲二爵
九月遣元主孫北還厚賜之且諭曰若果就俘即欲
遣歸以爾樛弱恐道里遼遠不能自達今長大矣朕

不忍爾久客於茲故特遣歸見爾父母以全骨肉之
愛又諭二故閭曰此而不主也不幸至此長途跋涉可
善朕之回貽書於其父曰昔君在應昌所遺稚子南
來朕待以殊禮者五年念君流離沙漠後嗣未有故
特遣護歸君其念之十月皇長孫生徙江南民十四
萬實中都十一月詔赦輕罪十二月鑿石厭山河日
本良懷遣人入貢却之

八年正月朝覲天下官貢濟寧州守方克勤有善政

賜宴禮部遣官祭功臣於鷄籠山增祀華雲龍李思
齊等八人二月御製資世通訓成詔行之申明馬政
三月詔興學勸農造大明寶鈔洪武正韻成四月幸
中都次滁州遣祭滁陽王甲辰夏至皇太子攝祭方
丘上於中都祭告天地尋還京五月市馬西番六
月詔諭安南高麗占城等國三年一朝貢王立則世
見七月免江南湖江田租八月京師旱開墾萊河十
月皇太子及秦晉楚靖江諸王講武中都十一月濟

涇陽洪渠堰鑄大鍾於鳳陽十二月陝州人獻天書
斬之

九年正月遣祭功臣祔余隆等百三十人二月定宗
王公主歲祿三月免南畿北平山陝江浙福建湖廣
河南田租四月琉球貢方物五月諭親王宮室無得
過飾六月改行中書省為承宣布政司七月遣祭功
臣祔何文輝等百六人免蘓松嘉湖田租九月遣使
諭徐達曰七月火星犯上將頌金星又犯之大將軍

其脩姦人刺客更定王府官制閏九月以五里素度
日月相刑詔求直言羅弘文館遣眎歷代帝王陵寢
禁煎牧百步內三人摧崩者封培之三年一遣祭諸
郡邑所祀忠臣烈士祠宇不治者時晉為分遣國子
生修岳鎮海瀆祠宇賜巾衣靴襪所至齎沐行事設
中庖戶十月更太廟後同堂異室之制定侑饗功臣
十二月賑江南湖北置軍夏諸衛

十年正月諭中書省曰諸除吏客長安以良費至空

乏稱貸一受事將取償焉何以教廉其自今謁選者
蚤與銓注銓選後差其品與道里費令有司給舟車
著為令二月遣官饗先農應天府率農民耆老陪祀
免士大夫家徭役四月命鄧愈等討吐番破之五月
荆蘄水患上命戶部主事趙乾往賑乾踰期不去
上聞大怒劾省臣曰民饑而上不恤咎在上吏受命
不能宣上意朕民死而不拯罪在吏朕寢食不安而
乾泄、若此其以大不敬論棄市有內侍供事久從

容言及政事 上立斥遣之曰諭羣臣曰古明君猷
為必謀諸公卿大夫而斷之已未聞嬖幸得預況寺
人朝夕左右其小善小信足以固結君心而使倭專
忍階亂多矣朕每以為戒故決去此輩侍朕久不姑
息也六月命政事啓皇太子處分然後聞七月置通
政司掌敷奏封駁如古納言遣監察御史巡按州縣
陞辭 帝曰御史代朕巡方以激濁揚清為事其不
能除貪黜暴者以不職論八月改建園立於南郊九

月浙西水災免田租十月新建社稷壇成十一月己卯皇孫元攸生大內宮殿成御殿朝賀十二月諭李善長等佐太子參決政事

十一年正月改封吳王為周王罷杭州護衛二月祀大社大稷奉仁祖配始製牙牌給朝奉文武官三月諭禮臣曰周書有言人無於水鑒當於民鑒胡元弊政凡奏事關白中書然後上聞故多壅蔽自今其許以寔封直詣朕前著為令四月上自製皇陵碑元

嗣君愛猷識里達臘殂于脫古思帖木兒立五月命
東宮文學編纂春秋本末選武臣子入國子監讀書
六月遣使祭故元嗣君於沙漠八月免南畿河南陝
西湖廣：東田租蘓松楊台海溢九月追封劉繼祖
為義惠侯詰曰朕微時海羅親喪艱於宅兆爾繼祖
以沃壤惠朕：得安厝皇考皇妣睦茲大德云何可
忘而勵勑方底歲月易流忽焉未報茲特贈爾義惠
侯妻姜氏夫人爾其有知服茲寵命仍以牲醴祭之

十月大祀殿成十一月吐番入寇征西將軍英討平之

十二年正月己卯合祀天地於南郊自齋誓至祭夕
天宇澄霽卿雲斐亹上大悅勅省臣曰朕周旋祀
事十有二年見儀文太煩廼以義更之今合祀天地
若有貯絮答於朕心其命載筆者紀之以彰皇天后
土之昭格三月視朝畢延諸儒臣賜坐便殿論治政
四月遣勅李文忠沐英曰頃者日交暈在秦分主戰

開茲己未太白見東方至甲子順行而南：征大利
爾等其順時追擊之勿失免北平田租六月勅遼東
守將潘敬等曰奏至知龍州民願率衆來降將軍識
其計否人情安土重遷柰何輕去其鄉而歸我此詐
也如隨其彀中不過一二年其害見矣傳曰毋納逋
逃勿妄生小隙使彼得以藉口其勿受之七月遣祭
功臣廟祔吳禎等百九十三人平羗將軍丁玉討平
蜀寇九月西平侯英大破西番班師十二月右丞相

汪廣洋貶海南於道暴卒詔徵天下博學老成之士
十三年正月丞相胡惟庸謀逆及御史大夫陳軍都
督李玉等皆伏誅詔罷中書省窮治惟庸獄坐者二
萬人二月詔郡縣舉聰明正直孝弟力田賢良方正
文學之士及精通術數者遣應天府祀歷代忠臣
上諭皇太子諸王曰吾平日無優伶贊狎無酣歌夜
飲正宮無自縱之權妃嬪無寵幸之昵朝政稽衆奉
決惟善是從燕閒之際一人之論尤加難審每旦星

存而出日入而休非疾弗情以此自防猶恐不及與
爾言之使知持守之道三月燕王之國北平減蘓松
嘉湖重租額四月都督張赫朱壽率舟師海運五月
甲午雷震謹身殿大赦天下罷周王府工役詔曰中
原民恃二麥今九月赴工正播種之時過此沍寒種
不得入土矣民何以續食吾甚恐其怨咨其勅至即
放遣之六月雷震奉天門置諫院頒臣戒錄於中外
七月罷秘書監凡內府書俱隸典籍九月置四輔官

十月詔求真才十二月列侯諸將屯田北平并練兵
於遼遣使諭日本不得侵擾

十四年正月詔征虜大將軍達左右副將軍和友德
北擊胡詔求賢編賦役黃冊三月大赦頒五經四書
於北方學校四月達等破虜班師五月五溪蠻作亂
江夏侯周德興等討平之六月海鹽捍海塘成八月
河決原武上曰此天災也塞之特勞民力其令防
護甯隄勿重困吾民九月征南將軍友德等帥師取

雲南十月免應天太平鎮江寧國廣德秋糧定考覈
殿最法十一月南雄侯趙庸討閩廣羣盜延安侯唐
勝宗討浙東山寇俱平之十二月令翰林院平駁諸
司奏啓遣內臣諭西南諸夷

十五年正月製九奏脩食樂章命朝覲官各舉所知
一人二月復諭雲南諸夷三月雲南平四月詔天下
通祀孔子賜學糧增師生月廩免南畿江浙河南山
東田租五月太學成上幸學行釋菜禮七月始用

半印勘合先是諸郡縣各持空印籍來京即錯誤便
於改竄上廉得之大怒以為欺罔遂詔逮行省臣
及諸長吏置獄吐死而丞若吏具榜百戍邊八月丙
戌皇后崩詔復開科取士九月熒惑犯南斗勅征南
諸將曰天無象以示儆也蠻夷叛服不常又好置毒
於水卿等率師久勞於外其嚴戒飭善水草以脩不
虞沐英等進擊平之十一月設殿閣大學士以劉仲
虞等為之徵耆儒鮑恂等脩顧問尋賜歸十二月孝

陵成封都督李新崇山侯

十六年正月諭刑官曰民命至重平恕猶恐失之況深文乎昨有子犯大辟而父行賄求免者御史廉得欲并論之朕以子死而父救之人情也故但論其子自今凡有論決必詳讞而後行二月命天下學校歲貢生員三月征南諸將班師還令沐英留守詔復鳳陽眎漢豐沛五月免應天太平鎮江寧國廣德田租令都司上衛所圖經七月詔更定冕服制遣御史錄

因諸省九月命申國公鄧鎮臨江侯陳鏞濟寧侯顧
敬討龍泉山寇平之十月頒鄉飲酒禮圖式於天下
十一月定祀歷代名臣十二月賜國子監生讀書燈
油

十七年正月遣魏國公達守北平信國公和築海上
諸城二月定諸司文移紙式更定都察院官三月大
赦頒科舉成式令與薦辟並行四月論平雲南功五
月高麗貢馬二千匹六月製大成樂器頒天下儒學

七月建朝天宮盱眙人獻天書斬之八月定考績法
九月遣中官蔡處士陳遇賜英鍾山十月冊李氏為
淑妃攝中宮事命駙馬李祺賑河南北平災旱閏十
月清獻天文志野書成十二月脩祖陵

十八年正月命江夏侯周德興等往河南招集故元
將校二月初昏五星並見求直言三月思州苗叛征
虜將軍和等帥師逆楚王討平之五月諭侍臣曰朕
夙興昧朝日晏始退自午至暮復然所決事有未當

者雖中夜不寐等度無憾然後即安侍臣對曰此蒼
生之福也但恐聖體過勞耳上曰吾豈好勞哉顧
自古國家未有不以勤而興怠而衰者天命去留人
心向背甚可畏也安敢暇逸六月禁諸司納賄七月
五開變叛和遣兵討平之八月遣勲臣還里九月築
漳河隄十月詔天下盡革積歲官吏為民害者輸作
城役御製大誥成頒示天下十一月作觀星臺十二
月舉孝廉

十九年正月穎國公友德等討雲貴諸蠻平之二月
納哈出寇邊三月省躬錄成四月河南大水令民有
鬻子者官代贖之定工匠役更番輪作及爪而代五
月詔舉經明行脩練達時務者邵縣禮選京師八月
皇太子修祖陵上閱宗史見太宗改封椿庫為內
藏庫顧為侍臣曰人君以四海為家寧有公私之別
太宗宗之賢君亦復如是況於漢之西園唐之瓊林
大盈乎每度支有缺貸於內藏俟歲餘則償之此商

估之行也後世困於兵革三司耗竭而內藏充溢自如間有費數十萬繕佐軍興者便以為難能皆太宗貽謀之不善耳九月賑旱蝗諸郡縣十月頒志戒錄十一月頒大誥三編

二十年正月命宗國公勝帥列侯守將北征納哈出焚錦衣衛刑具詔脩闕里孔子廟甲子郊祀禮成天氣清朗帝大悅侍臣進曰此陛下敬天之誠所致上曰所謂敬天者不在虛文在有其寔恤民者事天

之寔也上帝詔我猶我詔百官有司若不能福民是
委君命於草莽不敬莫大於是二月魚鱗圖冊成置
兩浙防倭衛所躬耕籍田遣官享先農禮成宴羣臣
於壇所御註洪範成四月命江夏侯周德興往福建
築城練兵防倭六月納哈出降遂班師七月定親王
歲祿九月置北平行都指揮使司於大寧青州旱蝗
民飢有司不以聞上怒曰青州飢而守臣不以聞
是豈代君牧民者哉其亟賑之就逮其官吏十月歷

代忠臣廟成命吏部遷南方數官有學行者於北安
置鄭國公常茂於龍州以藍玉為征虜大將軍唐勝
宗郭英副之率師討殘胡十一月普定侯陳柏靖寧
侯葉昇討東川諸蠻平之十二月大誥武臣復命陳
柏等屯田畢節

二十一年正月思倫業叛西平侯英討平之二月定
歷代名臣從祀帝王廟仍定廟制四月藍玉破胡於
捕魚兒海五月五色雲見侍臣稱賀却之討東川叛

續命傳友德為征南將軍沐英陳柏副之七月頒賜
天下武臣大誥令其子弟誦習使它日知撫教軍士
以稱保全功臣意八月征北諸將還賜宴奉天殿
上賦平胡詩二章命羣臣屬和九月越州阿資叛友
德分討具平之勅諭天下衛所屯田十月頒武士訓
誠錄更定歲貢生員例十一月以武臣多坐法特為
保守勅頒之

二十二年正月高麗權國事王昌請入朝却之二月

禁武臣干預民事三月命傅友德率二十四將軍分
駐潮州防西南夷四月置詹事院今杭湖溫台蘓松
諸郡民無田者就耕淮河以南及滁和諸州給鈔三
十定免賦役三歲五月置大寧福餘朵顏三衛於兀
良哈之地以居降胡六月上退朝謂侍臣曰人常
慮危乃不蹈危常慮患乃不及患車行峻坂而仆平
地保天下者亦如御車命孝廉茂才年四十以下者
於行人司差遣以試其才八月更定大明律九月廷

臣有言比來儒士起自田里擢用驟峻非朝廷愛重
名爵之意上曰朕患不得賢耳若伊尹出有莘孔
明起隆中豈嫌驟哉十月增建國子號舍以居諸生
之有家室者十一月思倫燕入貢百夷平

二十三年正月遣晉王燕王率諸將分道出擊胡肅
清胡黨榜列勲臣凡五十七人二月定王國合祀山
川諸神三月申定官民服飾四月築京城外垣閤四
月藍玉平諸番五月上念諸將老悉遣還鄉賜黃

白二金鈔若綺太師韓國公李善長賜死六月選用
省民有才德知典故者定東宮司經局官制七月江
南北海溢河決河南八月改鑄御史印定使節之制
十月封劉基孫薦為誠意伯增祿予世券詔刊行韻
會十一月置景東蒙化二衛十二月購遺書西番諸
夷遣使入貢

二十四年正月築浙東海隄城甘肅命傅友德將列
侯出塞擊胡二月命種桐棗棕樹於鍾山陽五十萬

株以資工用省民輸三月 上謂廷臣曰朕發庫中
古鏡十餘鑑多失真名工問之皆莫能答最後一工
曰範模不正朕惕然悟君心焉詔天_下貢茶勿得作大
小龍團茶戶採進勿預有司四月鑄渾天儀五月漢
衛谷慶寧岷六王練兵臨清定文武官員封贈勅禮
官曰朕御寓以來擢用儒者布列百司而卒少稱其
任良繇師道不立故爾其論天下凡儒者必以修己
教人毋徒尚文藝爾部其中勅之六月命禮部簡較

僧道河決原武入淮七月徙富民寔京師八月上
以江南地庠欲遷都陝西命皇太子巡視關洛九月
諭天下生員兼讀誥律民間子弟能誦大誥者賞之
十月北平大水免是年田租十一月皇太子還自陝
獻相宅圖十二月命景川侯曹震往四川治道

二十五年正月河決陽武二月詔在外公侯伯還京
三月勅列侯練兵西北塞罷民間歲輸馬草四月皇
太子薨五月藍玉破罕東移兵討建昌蠻六月勅玉

擒月魯帖木兒八月祔皇太子於孝陵東頒醒貪簡
要錄於諸司九月立皇孫允炆為皇太孫十月更高
麗為朝鮮國十一月建昌蠻平檻送月魯於京師伏
誅十二月勅馮勝等率師數十萬屯塞上閏十二月
勅刑部曰上天春生秋殺各有其時今陽春布澤萬
物遂生朕不忍罪囚沉滯獄底其悉貸之令輸粟於
邊得宥者四百四十八人

二十六年正月置大同東勝諸衛築城屯守二月晉

王統山西河南兵出塞捕虜涼國公藍玉謀反伏誅
三月籍藍玉家以服飾器用多僭竊踰制作稽制錄
御製序以頒諸功臣四月京師大旱詔求直言錄囚
徒因諭天下凡遇歲飢先發貸後奏聞著為令五月
陝西民有坐事謫戍邊妻病留途中其弟夫婦請代
往監送者聽之御史以為罪事聞於朝上曰弟代
兄義也命賜道里費并賞監送之人八月徙慶王於
常州九月罷中都國子學詔曰邇者朝臣不臣其無

忠義者如李善長等陰與構禍事覺各伏誅盜賊為
亂謀洩捉拿族誅萬五千人矣餘不盡者已榜赦之
肅奸頑無知尚生疑惑自今不分藍胡二黨未犯者
悉行赦宥十月徙岷王於雲南十一月東莞叛寇何
迪伏誅十二月頒永鑑錄於諸王

二十七年正月賑貸貧民二月勅諸將練兵防倭四
月令民樹桑棗五月却安南朝貢八月遣國子生分
詣天下督修水利九月定旌表孝行事例正蔡氏書

傳及寰宇通志成 上諭諸儒臣曰朕每觀天象自
洪武初有黑氣凝奎壁間今年春暮黑氣始銷文運
自此興矣十月罷建岷府宮殿勅曰滇土荒蕪民轉
饑良苦姑為棕亭以居俟十五年後民力稍紓更為
初造

二十八年正月勅周晉燕王發馬步軍往塞北屯田
二月分青兗濟南登萊民就東昌墾開田三月罷龍
江等權場四月詔停遼府宮室勅武定侯英曰邊境

營繕朕常為歸言不宜盡力以困之今所役皆強悍
力戰之人勞苦過多必逃匿草澤間古云人勞乃易
亂之原可深念也其暫停役且發少嶺倉以賑之五
月討平西川洞蠻六月禁黥宮彫剝之刑戒子孫朝
文武百官有請復肉刑及請復丞相者全家處斬七
月河南確山野繭成羣臣表賀上曰人君以天下
為家使野繭足以被天下朕當受賀一邑何為者其
已之有以道書獻者上曰朕將濟生民於壽域獨

愛一己之長生久眎哉不峻却之諸來言方術者當
接踵矣八月征南將軍楊文等討龍川諸蠻九月免
諸郡田租詔曰朕入建康勵兵秣馬與羣雄並驅諸
所供億皆江東五郡之民今天下平定而朕老矣思
民效力無可撫字者其蠲今年田租以蘇前日之勞
山東給遼左燕晉軍需民亦勞甚可蠲租如五郡閭
九月皇明祖訓成更定親王歲祿十月冊馬氏為皇
太孫妃十一月諸蠻悉平頒禮制集要十二月頒洪

武志書

二十九年正月罷朝造容閼左右民間事對以治平
高祖曰雖堯舜在上不能必天下無窮民朕恒以此
爲憂何遽言至治乎二月討柳桂蠻平之遣使緬國
及百夷三月罷楊柝逆祀孔廟易以董仲舒定外官
三年一覲之制四月命禮部翰林院考國子生甄其
材者送吏部擢用五月命湖廣諸郡種桑六月築河
防七月上閱唐書至魚朝恩謂侍臣曰奴儕無忌

憚至此然代宗一去之如孤雛腐鼠在斷與不斷耳
八月免太平等五郡田租御史王朴：喜直諫數
與上爭上怒命斬之遽召還曰汝其改乎朴對曰
陛下以臣為御史因責臣言何輒辱至此且謂臣有
罪安用生之謂無罪安得辱之上固赦朴聞朴言
復命斬之朴反接之市過史館大呼學士劉三吾聽
之某日日皇帝殺無罪御史朴也九月台天下致仕
武臣赴京上燕勞而諭之曰諸將軍逆朕平禍亂

效謀宣力勤勞脩至思昔與卿等皆少壯今老矣以
不相見於心終不忘故予諸將軍所賜雖薄聊以餽
老亦余意也卿等歸其善教子孫以終天年諸臣皆
感泣十月晦皇曾孫文奎生十一月頒稽古定制

三十年正月勅列侯脩虜關中須為政要錄四月令
軍民有材一藝者得自陳効用五月令晉燕代遼寧
谷六王勅兵脩虜六月舉子諱考官不明下學士劉
三吾等於獄覆試下第舉人賜韓克忠等進士及第

有差試官白信福舉子陳郊決選處死三吾謫戍八
月禁諸王非時興作九月令天下民里置木鐸一選
老者與瞽者月以六諭持鐸徇道路曰孝順父母尊
敬長上和睦鄉里教訓子孫各安生理毋作非為又
令村置鼓一農種時月晨而鼓之鼓鳴衆集及時力
種里老人督責其怠惰者惰而不督里老人則罰婚
姻死喪隨力相資以成仁俗十月停遼東海運十一
月上見散騎舍人衣殊鮮麗召問製用幾何曰五

百貫責之曰汝生長膏粱紈綺遊不知農桑艱苦夫
是衣也數口之家一歲資也十二月上不豫廷臣
數問起居勅曰元政不綱羣邪倡亂朕潛草野不得
已而逆戎西定荆楚東平吳越北撫中原為衆推戴
得有天下三十年於茲朕壽六七十矣非皇天眷命
得久若是古語云天不與苜亂者朕無心天下而心
抹民殆天命之乎比失調受疾渾等頻仍問安禮也
堯舜禹湯文武之世臯稷稷契伊周為臣一志匡主

朕以示卿等竭忠修職副朕至懷

三十一年正月命戶部遣人分詣山東河南督民耕
種二月定吏貢出身事例三月琉球中山王入貢已
丑享太廟畢顧立廟門名太常寺臣指桐梓諸樹曰
往年種此不覺成林鳳陽陵樹常無似此因感愴泣
下既曰昔太廟始成遷主就室朕退休夢皇考呼曰
西南有警覺出視朝果得邊報祖考昭臨時在上
爾等加敬中使旦暮洒掃省視以時毋有不虔時

上春秋高太子皇后俱無祿每忽不自得又念太
孫長厚顧廷臣無可受遺命者力疾視朝萬幾勞憊
五月甲寅復不豫乙亥猶勅燕王率諸王備虜其詞
曰朕觀成周之時天下治矣周公猶告成王曰詰爾
戎兵安不忘危之道也今雖海內無事然天象示戒
不可不防朕諸子汝獨才智克堪其任秦晉已薨繁
汝為長攘外安內非汝其誰爾其總率諸王相拱度
勢用防邊患又安黎庶以答天心且副吾付託之意

閏五月乙酉 上崩於西宮 上素少疾及疾作臨
朝決事如平時漸劇焚香祝天曰壽年久近國祚短
長子孫賢否簡在帝心為生民福特持符召燕王太
孫用事者矯詔却還之淮安疾劇 帝問第四子來
未聞雨降喜形於色遂崩壽七十一遺命喪葬儀物
一從儉樸毋金玉孝陵山川因其故諸王臨國中毋
奔喪天下臣民臨三日皆釋服毋妨嫁娶踰七日辛
卯葬孝陵建文元年二月上尊謚曰高皇帝廟號太

祖

石匱書曰漢高帝之功勝湯武矣桀紂斃痛其國人
不能徧四裔也我高皇帝之功勝舜禹矣洪水災
而居貧賤百人猶人也故夫漢高帝之功一世功也
高皇^帝之功萬世功也嗚呼休哉

袁學士劉三吾進曰皇孫世嫡富於春秋正位儲極
可繫四海之望願皇上無過傷太祖收淚而鎮
之於是立次孫為皇太孫太孫性仁厚孝友異常人